

Os afectados do "curraliño" de NGB concentraranse hoxe en Gondomar

Escrito por Valminor.info / Galicia Confidencial
Venres, 10 Febreiro 2012 05:09



A plataforma de afectados das "participacións preferentes de NovaGaliciaBanco" manifestaron onte, despois da concentración en Vigo, que non cesarán as súas mobilizacións ata recuperar os seus aforros.

Os antidisturbios protexen a oficina central dun intento de toma por parte dos afectados polas accións preferentes. Dous mil galegos teñen os seus aforros retidos por este opaco produto.

A plataforma de afectados do Val Miñor convocan para hoxe venres ás 10:30 unha protesta informativa diante da oficina de NGB en Gondomar.

Máis de doucentos afectados polas accións preferentes de Caixanova e Caixa Galicia tentaron tomar este serán a sede central de Novagalicia Banco (NGB) en Vigo. Impediullo un importante dispositivo policial da Unidade de Intervención Policial.

Unha fileira de 'antidisturbios' protexeu ao banco durante varios intres de tensión, pero sen que houbera maiores incidentes. Un helicóptero controlaba aos cidadáns, que cortaron o tráfico no centro da capital olívica.

Consumidores de Vigo, Mos, Gondomar, Nigrán, Moaña e Cangas berraron "chourizos", "ladróns" ou "cacos" acompañados de instrumentos. Esta é a segunda mobilización convocada, tras outra protesta en xaneiro en Vigo e Cangas, onde ocuparon unha oficina de NGB.

Segundo a Asociación de Usuarios da Banca (Adicae) Novagalicia Banco ten retidos os aforros dun uns 2.000 clientes. Adicae calcula que só non banco galego hai entre 70.000 e 100.000 a prexudicados, 575 da antiga Caixa Galicia e 503 de Caixanova. Esta asociación era quen convocaba a protesta de hoxe.

Galicia Confidencial foi dos primeiros medios galegos que deu noticia deste '[curraliño](#)'. Este martes GC e Valminor.info

[informaron](#)

que oficinas de NGB culpaban á prensa de enganar aos cidadáns alarmándoos innecesariamente, a raíz dun correo electrónico recibido por esta redacción.

A prensa galega trata mal a NGB?

Sobre a presunta acusación de responsábeis de NGB de que a prensa alarma innecesariamente por intereses dos propios medios, cómpre ter en conta que a práctica totalidade de cabeceiras do país arrastra importantes débedas con esta entidade. Ademais, NGB é un dos principais anunciantes da industria da comunicación galega.

O problema non é exclusivo nin de Galicia nin de NGB. Segundo [ADICAE](#), até oito entidades (Banco de Sabadell, BBVA, CAM, Catalunya Caixa, La Caixa, Nova Caixa Galicia, Banco Santander e Banca Cívica) teñen "atrapados" 30.000 millóns de aforros dos españois.

As caixas galegas foron nacionalizadas tras case quebrar tras apostar polo 'boom do ladrillo'. Os directivos que tomaron as decisións de investir na burbulla inmobiliara marcharon tras cobrar millonarias indemnizacións. Esta mesma semana NGB anunciou novos despedimentos, que probablemente chegarán en forma de ERE forzoso.

{youtube}WqxBBqPbDs{/youtube}

Os afectados do "curraliño" de NGB concentraranse hoxe en Gondomar

Escrito por Valminor.info / Galicia Confidencial
Venres, 10 Febreiro 2012 05:09

Información recollida no medio colaborador [Galicia Confidencial](#)